

雪嶠禪師語錄卷第十

魚十

參學門人弘珠等編

道行碑下

附

辛巳元旦大衆請上堂師至座前云昨夜鐵牛生獅子今朝滿地是光輝喝一喝陞座云

魚十

莫謂古人無奇特今人奇特勝前人因舉天

目斷崖大地山河一片雪之偈逐句下註脚

竟喝一喝曰到這裏容註脚不得爲甚如此

這點雪從那裏來今爲新正初一人人脚跟

下大須仔細如紅爐上點雪相似好則好矣

羨則羨何方不可是歸期只爲路窮山更杳

可憐墮落作奴兒珍重下座正月初六日解

制請上堂師至座前云開合有時人情大體

喝一喝陞座曰結制何如解制奇春風南北

各樓遲村中乞食無些子一片饑腸一首詩

六十五日前從何處來六十五日後從何處去是大神呪是大明呪正當六十五日內在
此中作麼若有相應者出來舉似老人爲汝
證明如無麤絆娑訶今日打開布袋一任諸
人東拋西擲橫行海內假如撞著黑面老爺
切莫道開先解制來大師孤情絕照不可一
世即出世大緣實悶然而起不得已而後應
在開先時有楚中李太宰夢白名長庚者通
書敘京師見幻有和尚機緣堅請住九峰祖
庭師不許復以書云近今末法衰替要個真
叅實悟的人萬中無一此事大不容易達磨
云行解相應是名曰祖而今人不論意識卜
度生死結根縱得十分相似皮毛而已便向
人前亂做宗門掃地或豎指或喝或云和尚
何不領話或打○相或拂袖便行或女人拜

此等皆是滅胡種之魔子也可悲可痛朽到
開先原非本意毒狠黃元公三回五次還他
一點道心結制一期混俗塵世太宰果欲上
山早幾日作盤桓了生死債可也蕭太史伯
玉名士瑋同李梅公問道師書有云居士江
西道人也佛法中大檀越樹蔭覆苾芻我來
開先上堂小叅出不得已遣日子豈有出世
念而到匡山做人不辜黃元公一片苦心爲
法門耳金太史正希名聲入山訊求法語師
開示云直饒文殊普賢快口利辭與麼不與
麼與那事毫沒交涉畢竟要辦冰冷心肝和
前所知所覺道理無道理乃至世諦習氣一
齊掃却掃不去拚命掃忽然掃破釋迦頂相
諸佛祖師鼻孔一時穿却快哉伯林吳居士
進堂結制一月便覺心地清楚信有此事雖

東十

二

與道遠肯如此朝夕做去自然有倒斷日子
古人云但辦肯心必不相賺大師到開先專
爲黃元公出世一番奇特因緣相與高流名
衲往還雖衆其眉毛厮結如從上諸公以佛
法相見者亦不數數惟與圓通方丈浪杖人
書云十七日煩公過開先設齋大衆甚渴感
謝之至老人即欲到圓通一談奈近日幻軀
覺有不快諒遲遲秋涼過一晤以誅曲直匡
山一家無分彼此矣笑笑初示海岸祝髮云
瓶錫家風話有年今朝自喜以相便海門擎
出千輪月廊廟誰談少一員竿木不妨逢敵
者林泉聊許放魚筌宰官二字雖然隱長老
之名天下傳既祝髮令爲知賓鉗錘遍授靡
不至海岸竟先出山作闍行師有示海岸調
侍者出山二首云方袍纔放剪解帶又思鄉

三

三

樂事忘清節苦心聞戒香青山夙有約冷月
愈生光應念時衰落家風同雪霜出山九月
時寒絮薄如詩孤影隨江遠雙眉何日期了
心無可寄鼓念有多岐一夜初聞雁梅花已
較遲又作辭院歌四百餘言中有此來扮出
不成套恨殺新城黃元公將就安身一年已
償債開先作短工之句以辛巳正月十五日
出山大衆苦留許以九月復來適有達道和
公久侍大師因令守開先方丈而示以偈云
大雪漫漫出院期秋風九月復來時不須頻
望山頭雁我自思歸結制時二月初一日過
江州地方見任別駕陳司理嚴德化令劉彭
澤令謝德安令徐衆居士等爲太守君平張
公祈嗣請師于能仁寺上堂師至座前執疏
云今日公案不必問如何若何遂過疏云以

此爲驗維那宣畢師一喝陞座維那白推師
隨聲一喝曰全體恁麼去全體恁麼來阿刺
刺阿刺刺一語相投善法堂百千天子施禪
祥山河永固田蠶熟處處笙歌樂帝鄉因說
祈嗣因緣竟大中書記出問大師今日舉揚
世諦佛法如何得一槌兩當去師曰你道釋
迦牟尼佛在甚麼處進云恁麼則石筍抽條
千萬枝也師曰不爲分外進云只如子歸就
父又作麼生師曰特地一場歡中禮拜云團
圓共說無生話師一喝中歸位有居士出問
只如張公祖多男之囑當生幾子師曰兩個
進云父母未生前通個消息師曰會取進云
生下又如何師曰惡水鷺頭澆士禮拜師曰
珍重下座江行道中師筆記云開先寺南唐
李中主開山屈指十六位尊者上堂說法遲

道者等崇禎庚辰三月徑山入此保社卓錫
一載有語錄梅花百詠落花三十韻山居詩
若干弟子范起叔輩刻流通其山居之一云
未到匡廬先有詩山林誰敢語多奇春三葉
嫩黃花笑秋九楓殘白雨悲淋出巖頭如雪
卷狂依樹底若雷推塔峰遙接故人至七十
獅翁作住持大師應請所至筆舌狼藉收拾
之人是以詮次爲難獨開先一會歲時顛末
迄今未散則有獅聲珠偃風璞等著意記錄
之功也師擬還徑山道經白下余公集生及
范大司馬質公名景文者復以祇陀林相邀
提唱休夏者久之時有高氏兄弟起名弘曠
弘曠及湯元衡居士起名教新者爲皈信檀
施之翹楚師是以低徊白下至秋九月始還
徑山過橋李晤埽道人一見即曰此番上山

須築語風生塔院好爲我作募疏埽留師住
城東藥山龍樹壇中師出自作一疏見示疏
意擬于高峰獅子巖用缸合而外灰石透地
三尺作室覆之偈曰諸方大人各出隻手助
我山中肉身之塔七十一歲古希出格先辦
後易他年快活雖有子孫不若親置堂堂三
界巍巍五峰塔在其上額曰語風後書辛巳
四月十九日某疏計著筆時尚寓祇陀林也
又擬製一龕作封龕偈云須彌頂上鐵爲龕
內有空王月一函不解秋光淨如練佛來相
見也垂簾埽如命作疏書之卷頭募得百鎰
遂從瓶窰擇二大缸昇之語風居因料理塔
院事至壬午秋月下山抵雲門以別因却請
仍還千指度歲除夕有詩二首搖搖松秒逗
春風送臘爐香一歲終空響驚毛翻白羽寒

封雞舌閣林中將爲暮色分先後誰道年光
別有公老我一身渾是膽何須剪髮學兒童
殘更春雨話寒暄臘盡明朝拜聖恩風雪替
零歸客暮松杉錯落斷人言誰聞爆竹鳴山
谷我亦題詩曉寺門知得循環顛倒者眼前

拈法付兒孫癸未春正月天童法屬費木諸
公走侍者上山啟致封塔之請師遂卓拄杖
往四明二月十一日上天童和尚供進云昔
日南嶽讓禪師曰道一去一向不見持個信
來著一僧去見他上堂出云作麼其僧如法
出衆云作麼馬祖曰自從胡亂後三十年不
曾少鹽醬今日天童這裏作麼生君子千里
同風某辦一箸菜飯供養師兄雖然無鹽醬
且喜滋味肯馨香禮拜而退舉天童和尚龕
喝一喝云癸未二月十有三日南山卜得一

穴最吉祥地修捨精藍人天大眾請師兄到
彼安樂受用自在逍遙惟願天童香火綿綿
德風遠播相繼祖燈如帝珠聯絡不絕法界
衆生俱爲瞻仰法駕蚤臨不必躊躇復曰起
封天童和尚塔進云稽首大哉俊哉我師兄
密雲和尚末法時拈出威音那邊鼻孔捏根
拄杖把住天下人舌根打人打得血淋淋地
海沸山騰乾坤黑暗猶是不肯住手復起臨
濟之宗非吾兄而誰今日退身三步藏身處
沒踪跡沒踪跡處且藏身更說一偈坐空千
界月諸佛汝同猜鑿破青山面將身就活埋
復云封十五日天童景德寺諸檀越同大眾
請上堂師陞座呵呵大笑喝一喝云笑個甚
麼笑那無舌人善能解語復喝云不必打葛
藤拈香畢遂斂衣就座曰若論此事盡大地

拈來在老人一毛孔中著不滿諸佛心印不
從人得既不從人得難道從牆壁瓦礫得既
不從牆壁瓦礫得難道從地水火風四大五
蘊喜怒哀樂而得豁開自己正眼炤天炤地
始知不從人得如啞子喫苦瓜向人道不得
遂鼓兩臂作獅子奮迅勢云獅子遊行不求
伴侶喝一喝下座二十日鄞邑陸敬身居士
等同大眾請師光溪天王寺上堂師陞座喝
一喝曰斬開碧落百花新扶起山門兩位人
古殿雖殘雲不老燈傳白月夜精神四明鄞
邑乃老朽故土爲送天童和尚入塔得得過
錢塘江城中縉紳居士留住數日此乃鄉情
眷眷陸長者發菩提心就此天王古剎請老
人陞座舉揚大事因緣知人人脚跟下有此
一段光明諸仁者莫錯用心是誰著衣喫飯

送客迎賓不必東語西話生從何來死從何
往喝一喝下座挽天童和尚詩云同出龍池
入路長吳興分袂過錢塘多年挂錫玲瓏石
今已藏身寂寞鄉雲面揭開紅日眼山眉愁
斷白花香離離一片苦心事且道何人在影
堂題天童和尚像十則之一云多年不學老
胡禪且喜今朝日勝年天大事來同涕唾艸
鞋不值半文錢師兄坐得好我亦徑山眠別
天童還雙徑作云塔豐事訖且抽身曉嶂重
重接遠鄰飄影葉乾風拭露點衣寒翠日初
新泉鳴沙澗遊山客天指肩與過嶺人獨抱
苦心帶歸去雙眉欲解在三春立夏前一日
進雲門道中云舟行兩岸春山老不見漁郎
捉草魚嫩綠樹邊橋接鷺初黃麥上燕窺畚
將爲暮色登新殿自許今朝與物疎聊把舊

情須短臘高談宇宙一荒廬因至外雲門顯
聖寺時三宜孟公爲本寺堂頭洞上湛和尚
法嗣也迎入方丈宜公拜延上堂力爲法門
大事因緣特特躬親白槌請師辨香拈出師
因登座拈香有昔年三登禹門皆有機緣此
乃嫡親嫡故無敢違者今日人天衆前撥轉
船頭順風把舵之語自此天童徑山葛藤截
斷矣自此天童去龍池來矣自此還山不半
月曳拄杖走荆溪掃幻有和尚塔拈幻有和
尚香把陳年茗蒂柄結宿世冤家案矣是役
也岌岌乎殆哉天童諸公借此以勸語風語
風亦借此以自勸苟非大出手眼擺壞鎖韁
遊行自在幾何不墮阮落塹哉個中消息因
緣語風向埽道人數數道破今日不言誰當
言者老人烟烟孤明肯覲面作誑語哉埽道

八

人還復自笑一生何幸得逢此兩大老冷眼
旁觀一打殺天下人一罵殺天下人畢竟打
有棒棒有眼眼有筋筋有喝喝有舌舌有骨
天童徑山同出母胎的的是威音王以前難
兄難弟歷恒沙劫效顰不得者也師以崇禎
十六年癸未夏四月之二十有六日至龍池
掃塔年七十有三歲矣時萬如微公爲龍池
堂頭天童法嗣也率大衆出山迎入師掃塔
跪祝云今日有此宗風乃梁朝達磨大師過
我東震旦國相傳至六祖以下列爲五宗各
立門庭以應達磨大師一花開五葉結果自
然成之識而今法眼尚在高麗瀉仰杳無音
信曹洞雲門依稀有人唯有臨濟一宗沿流
不止至我笑巖師翁師翁付先師幻有和尚
今日塔前唯有徑山一人是師嫡子特具薄

九

十

供分付主山神主地神主林神主空神等護
持我先師全身法塔如今大明國內愚癡者
甚多見性者甚少惟願先師常寂光中加被
衆生遠紹教外別傳之旨不負達磨大師笑
巖師翁以此敬爲人天供養越二日荆溪吳

九敘居士等同禹門大衆請師上堂師至座
前喝一喝便陞座曰抱暑進山所爲何事多
年不到龍池今日特來掃塔薰風自南來殿
角生微涼倦來困一覺何必好眠牀拈香竟
就坐曰佛法正是衰替時節各宜努力以求

出世人人埋没多生今朝若不透徹何時解
脫因舉南嶽叅六祖說似一物即不中機緣
云 這個一物即不中便是六祖大師本來

無一物合轍之語所以祖祖相傳佛佛授受
與達磨大師正法眼藏合文合節若有一言

半字差異即同魔外何爲臨濟正宗也卓拄
杖下座龍池掃塔詩云銅棺山下養龍池步
入涼風覓我師當尸娑羅空腹樹迎堦芳草
昔人眉追思滴血曾留偈會寫傳燈嗣法詩
今日塔前成九頓流源千載繼孫兒寓南嶽
寺度夏詩云相憐逸骨初爲客舉動不如山
裏時南嶽風高山近月芙蓉秋老夜看枝食
牛膽氣腥猶在跨虎雄心早斷思憶子未疑
奇特事獨餘數尺洗腸池瀕出荆溪時三一
道人吳永功九敘氏以語錄全帙呈大師師
曰恐無眼禿兵作是非會姑逸之俟我涅槃
後刻可也時埽道人與黃給事聞齋曹侍御
石倉朱太守葵石謀延師開法禾城東塔屬
侍達羽培走荆溪致公啟以請師答書云自
小持齋今已老見人無力下禪牀此乃趙州

老漢尊貴宗門之語從上來無一人知伊脚
跟著落處朽操道行脚尚不見踏破一綱草
鞋忽爾一日知非直向孤峰絕頂巉巖水邊
盤結草菴獨行獨坐冷煖自知折脚鐺邊得
些子消息只可自受用前月徑山出嶺到荆
溪掃幻有先師法塔不意相逢宜邑幾多在
道居士苦留南嶽度夏盤桓有日今復思歸
高眠竹枕嘉興者借路經過何敢望東塔廁
清涼老師足蹟也切思人命懸絲剎那異世
况朽無味于宗門何宗門之有我衆位居士
欲老朽挂榜出賣死猫頭決不敢領命只隨
喜數日以通方情時掃道人附絕句邀之師
次韻荅云老身扶杖肩頭痛有水不能擔出
山一任諸人齊叫渴活埋烟雨草亭灣掃道
人再以絕句附監院邀之師乃許赴再次韻

惠十

十一

荅云秋風桂子點亭臺香雨淋漓不屬裁昨
夜月中親手折十分光彩自東來以八月初
八日到東塔入方丈十五日曹石倉朱葵石
汪爾陶諸宰官王季延嚴轅轢李珂雪丁元
公孫培菴吳水原朱子藻子葆子容孫起伯
諸居士掃道人同弟閻仲侄戈文及合山大
衆等請上堂師陞座云東塔寺前問水神相
逢盡作帝鄉人故園田地如何會一喝分明
介主賓拈香白椎竟師就座舉仰山問洪恩
如何得見佛性義洪恩與說獼猴睡著猩猩
相見公案云若無仰山後語幾乎獼猴個個
無尾巴諸人要見佛性義麼漁船上有塹壩
堆頭有下座中秋日掃道人延師于東塔之
右藥山佛仔草堂中坐月師即席爲詩云望
月林間坐石牀寒侵衣帶未經霜吟心何待

梧桐老烟水欲期楊柳黃玉魄空飛流夕影
浮圖遠插到山堂此來爲採峰頭藥誰弄中
秋曲水觴至明日復依原韻續成四首緇白
步韻者丁元公等累百有彙帙梓行者題曰
藥山月籟是月廿九日埽道人生日親友衆
居士爲設齋請師上堂陞座云佛身充滿於
法界普現一切羣生前隨緣赴感靡不周而
恒處此菩提座今日老人于此下個註脚佛
身充滿於法界到不得者裏普現一切羣生
前太勞勞生隨緣赴感靡不周還見麼而恒
處此菩提座掀翻他窠臼有明眼者出來簡
點看僧出問如何是向上一乘師曰塔尖峰
頂如何是向下事師曰幡竿動也意旨如何
師曰地藏菩薩又僧出問擊碎東塔踏翻太
湖且道此人具甚麼手眼師舉如意示之進

魚子

十二

云批却德山棒放下臨濟喝還有爲人處也
無師曰到得這裏麼下座九月初八日雲間
徐序東居士薦母同大衆請上堂師陞座曰
古人道父母非我親誰是最親者諸佛非我
道誰是最道者父母既非我親畢竟誰是至
親有伶俐衲僧出來道看一僧纔出師便喝
珍重下座十月初一日結制請上堂師陞座
拈香竟師曰結制無有他爲切念生死大事
到此禪堂不得東語西話不得亂想胡思一
心正念提起話頭看個父母未生前那個是
我本來面目若不苦心參究受他施主供養
滴水難消切須仔細下座臘八日暮曹石倉
設齋同埽道人及衆居士合山大衆請師方
丈小叅說行脚師陞座大喝一聲曰苦哉苦
哉遂涕泗交下襟袖爲之濕透良久備言在

家出家種種艱難辛苦叅方得道因緣堂中
聞者動色多有泣下者秉燭更餘下座始散
大抵與徑山語風居所說二會無異語在徑
山錄中甲申元旦場道人同石倉葵石珂雪
爾陶季延輟轡子孫子容範臣水原高寓公

卷十

十三

魯孔孫程范卿諸宰官居士率子吉彭暨合

山大衆請上堂師陞座曰且道新年頭佛法
如何舉揚村村蠶麥熟處處稻花香拈香竟
忽聞爆竹聲隨云爆竹一聲天地老塔前無
處不光輝即此是法即此是道大衆久立珍

重下座正月初八日解制陸登之設齋同諸
宰官居士請上堂師陞座曰結制解制爲個
甚麼祇爲當人脚跟下一段大事不明如大
火聚不得清涼所以道十方同聚會個個學
無爲此是選佛場心空及第歸一期過了堂

中不見一個半個雖然且喜太平良久云一
二三四五六七萬仞峰頭獨足立問伊你更
是阿誰我是人間白拈賊遂喝一喝曰十字
街頭撞著馬相公與你索飯錢你作麼生祇
對衆無語師曰老人與你代一轉語春風日
日到園林夜夜面南看北斗時黃海岸從家
中來已入仕籍機舟東塔方丈溪邊冠巾問
道者三日夜而行師亦隨曳拄杖返徑山矣
瀕行朱公葵石走送索題夢石譜師爲題云
玄黃宇宙不可摸眼耳鼻舌要能知吾有居
士最靈異翛然不滯雲水機夜深獨臥鴛湖
閣神人出沒不可思千古萬古性一真劍銘
雖利難割水化石且教遺在夢天明小樓紅
日起蓋師往還朝夕指示語也東塔一期觀
生監院檀度全集江南法會之盛近所未有

餘施作徑山合山齋而還二月末師至千指
叅徒日衆菴無容足處有內監出家名大徹
者慕師道望到山皈依久之見大殿方丈主
僧不足爲徑山重而潞藩以國亂適馭武林
崇信佛法監微因奏請依大慧禪師被旨住
持例不由地方檀越敦請驟破規格大駭觀
聞八月屆期藩使者特以扁額齋供隆禮來
迎入院而羣不逞者竟入關爭堅固劫中師
爾時方嘯傲巖頭無意登座亦絕不曉聚訟
來緣一瓢下山復來橋李驀然與埽道人相
見呵呵大笑埽道人問侍者乃知其槩亦笑
曰佛法付與國王大臣今別成一番奇特曲
調徑山開堂說法竟矣然雖如是令旨不行
國事從此可知矣仍留師住藥山龍樹壇中
往來托宿吳水原居士齋頭者久之雲間徐

孝廉序東游承起名弘畫者前數來東塔與
師機緣不淺此日專啟來迎埽道人時膺再
召不得已赴金陵相與一笑別去師至雲間
與單進士狷菴恂起名弘尚者同衆居士延
入超果寺時乙酉三月十有七日也監院知
一靜主紹源并合山大衆暨合郡檀護請祝
聖上堂師拈香白椎竟師曰暮春三月好風
光盡見遊心白面郎國界無虞今日定夜深
皓月照長廊豎拂子云即此用離此用復震
威一喝云此是馬祖陳爛公案不勞拈出今
日打些新鮮葛藤與大衆結緣會麼若論佛
法三世諸佛無下口處歷代祖師結舌有分
何以故法如是故祖佛出世蓋爲一切衆生
沉淪苦海墮落五欲所以開方便門接引愚
癡咄言多去道轉遠還有問話者麼僧出問

如何是大師方便門師以拂子畫一畫曰會
麼太平日月光天德一統山河壯帝居師卓
拄杖下座金澤頤浩寺監院一輪同宋存植
徐濟承李莊徐復曾陸慶雍衆居士及弟子
教忻教守教果等三日三請上堂第一日上
堂師臨座云七十五年何處來燈籠生脚上
天台癡人知道我來處三月菜花歷路開老
人于甲申八月被業風吹入雲間今日蒙請
登此法座說些閒談說話拈香竟乃舉圓悟
叅五祖小豔詩公案復舉臨濟離家舍不離
家舍公案下註脚著語竟末舉華嚴偈云毘
盧遮那佛願力週沙界一切國土中恒轉無
上輪今日盧舍那佛在徑山拂子頭上轉大
法輪大衆還聞麼還見麼良久云既不見不
聞何人得聞牆壁瓦礫得聞牆壁瓦礫說法

何人得聞徑山拂子得聞聞的事作麼生師
曰如是我聞大衆久立珍重下座第二日上
堂陞座曰乘言者喪滯句者迷古人已道破
了也何故要你向自性三昧海中狂波闊浪
裏轉身吐氣始有說話分更須向深雲窮谷
養得純純熟熟方可出來人天衆前舉揚個
事光耀祖庭瞻之仰之庶不辜負達磨大師
西來一番辛苦若也不然只是個蝦蟆田雞
亂跳亂叫成得個甚麼邊事乃呵呵大笑復
曰笑個甚麼笑那吳山端獅子見弄獅子得
悟後有老僧譏他故說偈云鄉裏獅子鄉裏
弄眼睛鼻頭一齊動假饒弄到帝王前也是
一場乾打哄有時上堂云佛法無可得說不
如打個觔斗便下座徑山今日在頤浩上堂
也沒有獅子弄也不打觔斗說些平實話接

物利生且道如何是接物利生句。聾叅須實
叅悟須實悟。有僧出禮拜。擬問師便打云。待
你開口。成得個甚麼。卓拄杖下座。第三日上
堂。陞座曰。今日登此寶座。爲那本鎮居士設
齋供養。老人說些佛法。普利衆生。諸仁者莫
瞋睡惺惺。著眼前山林池沼。無非是你故宅。
只爲離鄉太久。所以不得受用。良久云。樂云
樂云。鐘鼓云乎哉。禮云禮云。玉帛云乎哉。即
此見聞。非見聞。無餘聲色。可呈君個中。若了
原無事體。用何妨分。不分卓拄杖云。離中虛
坎中滿。下座。明日游承居士等請茶話。師曰
真個難得的。也是希有事。頤浩寺裏三日三
上堂。是爲希有。是爲難得。諸方聞之。也不知
是佛法也。不知是世法。因論叅禪學佛。非是
等閒痛切五百餘言。末舉黃檗云。不道無禪。
魚十

只是無師應。在今日矣。良久云。適纔老人這
些說話。若論世法。則不無。若論佛法。遠之遠
矣。師去雲間。過抱香菴。有請開示者。師與偈
云。啼破春風血未乾。月明枝上漏聲殘。誰家
猶自貪歌舞。舞散歌停魂夢難。叅埽叅此偈。
恰寓亂離鼎革之象。佛緣實世緣也。四月上
徑山。歷五六月間。山中北虎南狼。禪寮蹂躪
無寧。晷師遂遁跡于山後火龍頂菴。菴中者
匝月。一日數兵丁逐一僧至菴。縛之。將加刃
師力勸之。并師就縛。忽一頭目至。吐曰。此地
不可縛人。親解師縛。并釋縛僧。以刀斫菴門
者三而去。師仍豪眺風巖。作開示侍者語云。
百日內外變狀萬千。如夢如幻。縱得心地道
理明白者。未免有些子介帶。吾謂娑婆世界
是個銀汞法聚。得成團忽。從罅縫處流將去。

若欲不流無縫始得銀汞乃流動性難可把
捉銀汞虛明能藥能毒今人先不知何者是
汞何者是鍊嗟嗟銀汞流去不遠既不知所
從來因地去何曾得知著落處所杳杳冥冥
晝夜愁腸心生懊惱何時還我昔日之歡娛
去我今日之心垢且人從有漏中來原從有
漏中去理固然也佛云和合妄生和合妄死
如春在花紅白暫時耳天也風霜雷電忽有
忽無人命無常忽生忽死豈有根而不壞者
虛空神告其人曰汝之命根在我命根裏其
人快活歡喜不已我之命根與虛空同壽虛
空神咄曰癡人我性本空何法與汝同壽癡
人復告空神曰既不與我同壽我之命根還
在那裏空神曰汝若欲知命根著落當自究
竟未出母胎前一著此乃諸佛護念衆生之

命根也汝當學多生習氣昏墜罪業深固力
欲拔之無處下手奈何下手處甚有但不肯
信何以故福深德遠業性漸輕般若漸近好
事多做看肉身原同敗壞之物無可繫戀宣
子光明忽然而現埽道人得大師此法語真
蹟自識乙酉夏日徑山火龍頂書還念此恁
麼時作恁麼話若非命根實斷生死真空不
能道隻字也想見當日將頭臨白刃一似斬
春風氣象任他天地反覆龍蛇起陸徑山這
裏只是說法如雷放光動地一時惟拂子得
聞惟埽道人得聞還念平日上堂法語都是
如語實語不誑語不異語也師復戲書硯巖
云九月化去果以是月雲門僧鏡可來延師
從兵戈中渡江而往猶在魯藩爰立時也雲
門故得道地師每捲懷及之天龍扈從緇白

奔轅遂得從離亂中法幢復建振力激揚春
日進雲門詩云雲抱千山新木葉鳥鳴一徑
落花枝雛猿覓石翻松子老鶴銜烟綴紫芝
淺澗吹流峰有月石橋送影候多時古規梵
刹呈君看拄杖擔來未稱奇至上堂拈香

魚十

十九

竟就座曰雲門有一奇特事從曠大劫來無
人動著今日分明舉似大眾良久云忘却了
也曳拄杖下座師于雲門掩關者久之守關
者荆門禪人也合山大眾及諸檀護以結制
有期請爲出關上堂師陞座曰春秋三度掩
柴關無事於心不放閒今日聊通一線道踏
開烟水入深山既是出關合該逍遙山水于
石橋啜茗焚香于溪閣爲什麼又要入山聲
爲他途路不得力下座結制日大眾請上堂
師陞座曰欲知佛性義當觀時節因緣時節

若至其理自彰大眾今日是甚麼時節舉拂
子一拂云雲門老古錘出世也地搖六震天
雨四花且道有何祥瑞五雲山下青獅子曳
尾搖頭弄爪牙隨喝云這畜生休作怪要騎
便騎要下便下下座丙戌除夕茶話師示偈
云今朝除夕又逢春大眾威儀事可伸棕蓼
拂子如何道草木高低一樣青時蓋歲朝春
也丁亥二月初十日師誕日解制大眾請上
堂師陞座曰老人自住雲門已來不曾動著
一步不曾措著一辭今日幸遇解制打開長
汀子布袋放出百千萬億光明雲將五湖四
海衲子而爲眷屬使歷劫多生父母俱超樂
國以拂子打○相云會麼盡十方世界是燃
燈古佛光明門盡十方世界是釋迦老子總
持門盡十方世界是兜率陀天彌勒世尊解

脫門盡十方世界是文殊師利法王子般若
波羅密門盡十方世界是普賢菩薩行願門
盡十方世界是一切修多羅差別義海門盡
十方世界是凡夫衆生四生六道微細極微
細昆蟲蚤虱生滅門喝云今日雲門解制猶

學

二十

如螃蟹去草縛橫行直撞切須仔細倘遇無
厭足王莫道我是雲門解制來若道著被他
棒打折你驢腰莫言不道下座師在雲門
未結制前金司馬正希黃祠部海岸已殉難
白門矣時有魯太史青海出家祝髮師示以
偈云性海無波下一橈千花覆頂伴漁樵林
間散誕成蓮社石上提撕好挂瓢昔日衣冠
懸碧漢今朝杖履渡溪橋法門得入多生幸
笑指長空破寂寥丁亥新秋寄子容朱居士
起名弘肇者詩一首云信知黃葉亂正是落

秋時去此東溪遠無聞拾野炊水流焦塔影
魚啞夕陽碑寄想南湖月鄰峰許我詩繼此
遂不復作詩獨作一書寄埽道人末云老人
邇來晨昏無繫寒光野色盡爲眷屬今當行
脚去踏明月于萬方咏清霜于千里古人云
未有長行而不住未有長住而不行者老人
得之矣笑笑一日遣侍僧囑之往南雍任所
見埽道人屬以料理語風塔院事僧未及行
師已示微疾因坐次偶侍者請師肖像贊師
題云誰個不識你自雙髻山主口吧吧終日
罵人大唐國裏無人中你意如此空腹高心
將八斛四斗蟪蛄蟲塞你眼根白雲萬里塞
你意根教你要動動不得要罵罵不得誦大
明王真言陀羅尼咒至七日轉身吐氣慧性
開朗若有人問你如何是祖師西來意如何

是庭前柏樹子不必擬議隨口答去無不合
轍無不自在題竟忽厲聲曰如今還開口動
舌得麼羣侍者爲之愕然從此令執事封叅
堂鐘板曰果學道人安事此遂三日不飯惟
飲清水令侍者必呼爲茶舉必以索不如令
則不飲口中惟唱雪花飛雪花飛驚毛雪滿
空飛時未見雪聞者不解師自知期至沐浴
著衣結跏趺坐大衆圍繞師遂唱偈曰小兒
曹生死路上須逍遙皎月冰霜曉喫盃茶坐
脫去了侍者進茶俄頃寂去身不歇側三日
如生示寂之日蓋八月二十有六日也世壽
七十有七僧臘四十有九所著傳世語錄有
徑山自述行略千指菴辭開堂說徑山長明
金粟金陵靜明廬山開先江州能仁四明天
童景德光溪天王會稽雲門顯聖荆溪龍池

嘉禾東塔雲間超果金澤頤浩若干處若干
會結制解制上堂小叅法語梓錄若干卷復
有拈古頌古懷淨土梅花落花等詩偈若干
首每題竝以百計各有梓本其隨手散落詞
翰圖寫爲世珍拾者無算也先是東塔晚叅
茶話次婦道人曰要與大師作平實商量師
住山有年到處出世亦多年矣每一期竟其
間問答叅請輒蒙訶斥者走入他方便得拄
杖拂子而還只今有他方記莚掩耳來皈者
又添反復冷嚴不容著足無乃拒人已甚乎
師長嘆曰佛祖慧命非通小可智過于師方
堪傳授目前那得有如我的真叅實悟盡底
掀翻吾寧棧絕以重大法掃菴曰宜乎唯一
首座之捲單去也因問海岸畢竟何如師曰
還是他良久曰也沒交涉末後在雲門郭爾

章居士問曰大師究不囑累奈何師曰此事
奴污甚吾故嚴之庶以矜貴法門耳臨寂一
月出山門至竹橋遇一寒士父子無所得食
師招之入室飲噉之其父秋涼無衣師脫新
施羅衫與衣之其子夜苦蚊師以說法棕拂
付之驅蚊大笑曰快哉吾衣拂付汝父子矣
後諸方遂誦傳有大師衣鉢付花子之說要
知衣拂陳迹雖掃英靈嗣子正多只據目前
付囑各處道場便作淵源印證如曹源金
獅聲珠 徹崖歇 山鳴瑤 子畫宗 形
山淖 竝弘字一輩出頭法乳也若夫唯一
叅開先東塔晚叅雲門數番破格盤桓其嗣
縱不在圓弘頓教十六字之派亦足當老人
法乳者也元禮頓湘親侍記錄最久忠勤不
二寂葬語風不可沒也師寂時覺浪盛公主

卷十

三

席徑山方應請金陵報恩思彥侍者走南雍
報訃于埽道人即日拉同蔡二白張如磐陳
旻昭倪樸菴凌官球錢文青潘墨海劉惺心
林道生諸宰官顧與治余未也薛更生姚伯
右姚叔采黃觀之諸居士等翕集嚮皈善信
數百人設齋請浪公上堂舉揚老人祕旨及
示寂機緣各各思慕讚歎因說徑山祖庭位
次梓有法語定議王子安偃公同魯青海如
公在雲門得山翁忘公從慈水來赴封龕執
義主老人喪同襄大事卜窆雲門寺之右隴
以是年十二月二十二日塔全身焉封龕入
塔忘公各有法語時有上座實際者新侍大
師恰值歸寂料理塔院事實周且恭此老人
末後一番大放光明也老人悟道石在普濟
寺今新建大殿諸人用作柱礎以表識靈蹟

老人示寂前六日過之令侍者拜而笑是知
雲門得地直到龍池證明此日回首藏身始
印悟緣夙識即有語風生塔之命僅可以爪
髮了付囑此實雲門特節因緣乃有不揣脚
跟造正名拈香之謗者現受惡舌之報諸方
共聞信哉佛法之必驗古德之足欽也是爲
頌頌曰

語風出世震羣雄 發真歸元隕虛空
舌頭坐斷踞巍峰 劫鼻當年隆準公
谷訣記前無留踪 賓主齊彰道岸崇
律儀解脫清規隆 兒戲莊嚴法界中
雙髻雙徑遊鴻濛 雲門雲棲鼓雷風
龍池儵忽騰三龍 一龍幻化青獅翁
心空及第登梵宮 寒白掀翻消息通
蹴踏諸方血濺紅 沒石飲羽神臂弓

撒開皮袋雲萬重 風光本地披玲瓏
响喚低眉慈姥雍 拈提努目金剛兇
呵佛罵祖誓不容 罵人直罵到天童
尺布可縫斗可春 閨牆兄弟在宗工
鬬爭揖讓狀難供 斷崖中峰機用同

摩尼五色肉眼朦 塗毒一聲癡耳聾
禪林裨販法市幾 堅壁固壘睢陽功
祖關慧命扼喉嚨 壇坫冰寒鮮伏戎
三驅百戰無前鋒 甘會道場四結冬
一個半個流西東 叩竭參苓誰入籠
三十 殺活予奪緇白鉢 任他鑪鞴瀉金銅
那許羶冶成凍僵 智過堪傳早發蒙
手應自肯把不逢 獅絃絕響曲調終
北斗藏身撒手封 宗綱正印真孝忠
人天號令齊嶽嵩 提唱文詞韶蘆從

